

Zakazan vam je termin za pregled dojki u klinici BreastScreen WA, gdje će vas pregledati i obraditi naš tim specijalno osposobljenog profesionalnog zdravstvenog osoblja.

Nije neobično da žene budu ponovo pozvane da urade neke dodatne testove. 90% žena koje se ponovo pozovu da urade dodatne testove imaju normalne rezultate po završetku pregleda i nemaju rak dojke.

U ovom informativnom listu opisuje se šta se može desiti u klinici. Možda ćete trebati otići na još jedno rentgensko snimanje dojki ili na ultrazvuk dojki ili na oboje. Možda ćete također imati test iglom u dojkama. Iako ti testovi možda zvuče malo zabrinjavajuće, većina žena ne nalazi da su naročito neugodni. Za većinu slučajeva raka dojke bit će postavljena dijagnoza putem testova koje preporučuju naši zdravstveni stručnjaci, ali nijedan test ne garantuje otkrivanje svih rakova dojke. Važno je da se sve žene podvrgnu svakom dodatnom ispitivanju koje se preporuči. U testove koji će se možda obaviti može biti uključeno sljedeće:

Klinički pregled dojki

Doktorica za pregled dojki će obaviti temeljiti fizički pregled vaših dojki i postaviti pitanja o vašem medicinskom historijatu.

Dijagnostički mamogram

Mogu se snimiti dodatne rentgenske snimke dojke kao dodatan pregled onog dijela dojke koji privlači pažnju.

Ultrazvuk dojke

To je test koji koristi zvučne talase (ne radijaciju) da bi se detaljnije pregledali dijelovi tkiva dojke. Dojka se namaže želeom i sonda se pritisne na kožu.

Biopsija – uzimanje uzorka putem tanke igle (FNA)

Koristi se tanka igla za vađenje nekoliko ćelija iz dojke i te ćelije ispituje patolog pod mikroskopom. Ako se mjesto koje privlači pažnju ne može napipati, može se obaviti FNA tako što će se igla usmjeravati pomoću ultrazvuka ili specijalne mašine za rentgensko snimanje dojke. Rezultati se mogu dobiti isti dan.

Sržna biopsija

Koristi se malo veća igla za uzimanje malih uzoraka (srži) tkiva dojke za pregled pod mikroskopom. Koristit će se lokalna anestezija. Tkivo će pregledati patolog. Ako se mjesto koje privlači pažnju ne može napipati, igla se usmjerava na pravo područje pomoću ultrazvuka ili specijalne mašine za rentgensko snimanje dojke. Ti rezultati se uglavnom mogu dobiti za 1-2 dana.

Molimo imajte u vidu da će trebati od 6 do 8 sati za vaš kompletan pregled.